

Inatsisissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Naalakkersuisut 1.900.000.000 kr.-it (1,9 mia. kr.-it) tikillugit taarsigassarsinnaanissaat Nunanit allanit aningaasanik taarsigassarsinissaq pillugu Inatsisartut inatsisaatigut nr. 13, 28. oktober 1993-imeersukkut piginnaatitsissutigineqarpoq. Taamaalillutik Naalakkersuisut Inatsisartunik imaluunniit Aningaasaqarnermut Akileraartarnermullu Ataatsimiititaliamik akuersisitseqqaaratik taarsigassarsinnaanerit Inatsisartut inatsisaata periarfissippaa. Inatsisartut inatsisaat maanna atuuttoq nunatta karsiata akiitsoqarnerata nalaani, akiitsorineqartut akilersinnaajumallugit taarsigassarsiniarsinnaanissaq aqqutissiukkumallugu akuersissutigineqarsimavoq.

Naalakkersuisut ilassutitut aningaasaliissutissat pillugit suliassamik Inatsisartunut imaluunniit Aningaasaqarnermut Akileraartarnermullu Ataatsimiititaliamut saqqummiusseqqaaratik aningaasanik amerlasuunik taarsigassarsiniarsinnaanissaat ineriartorsimanerup kingunerisaanik naleqqukkunnaarsimavoq. Allatut oqaatigalugu, inatsit maanna atuuttoq maanna pissusiusunut naleqqukkunnaarsimavoq.

Nutaanik mittarfiliortiternissamik pioreersunillu allilerinissamik maanna pilersaarusernerup nassarisaanik eqqartorneqalerpoq inatsisartut inatsisaat maanna atuuttoq ullutsinnut naapertuuttumik siunertaqarnerisooq. Naalakkersuisut taamaattoqarsorinngilaat. Taamaammatt Naalakkersuisut isumaqarput Nunanit allanit aningaasanik taarsigassarsinissaq pillugu Inatsisartut inatsisaat atorunnaarsineqartariaqartoq. Namminersorlutik Oqartussat taarsigassarsiariniagaat sulluunniit Inatsisartunut imaluunniit Aningaasaqarnermut Akileraartarnermullu Ataatsimiititaliamut saqqummiunneqaaqqartarnissaat tassuunakkut nalornissutissaajunaarsinneqassaaq.

Inatsisartut inatsisaat kingullermik atorneqarpoq 2010-mi 2012-imilu, tassa Naalakkersuisut Nordisk Investeringsbankimit katillugit 550 mio. kr.-inik taarsigassarsinissaat inatsisikkut periarfissineqarmat.

2. Siunnersuutip imarisai pingaarnertit

Nunanit allanit aningaasanik taarsigassarsinissaq pillugu Inatsisartut inatsisaata nr. 13, 28. oktober 1993-imeersup atorunnaarsinneqarnissaa, atorunnaarsitsinerullu ullormi, Inatsisartut inatsisaata saqqummiunneqarfiata aqaguani atortuulernissaa siunnersuutaapput.

3. Pisortanut aningaasatigut allaffissornikkullu sunniutissai

Inatsisartut inatsisaat pisortanut aningaasatigut allaffissornikkulluunniit sunniuteqannigilaq. Naalakkersuisut Nunatta Karsiata taarsigassarsiaasa ilaat akilersinnaajumallugit taarsigassarserusuppata,

tamanna Inatsisartunit imaluunniit Aningaasaqarnermut Akileraartarnermullu Ataatsimiititaliamit akuersissutigineqaqqaassaaq, tamannalu taarsigassarsiaareersut akilersinnaajumallugit taarsigassarsiniarnissamik ajornarnerulersitsisinnaavoq. Akornulli taanna annikitsuinnaasorineqarpoq.

4. Inuussutissarsiutinik ingerlataqartunut aningaasatigut allaffissornikkullu sunniutissai

Inatsisartut inatsisaat inuussutissarsiutinik ingerlataqartunut aningaasatigut allaffissornikkulluunniit siunniuteqanngilaq.

5. Avatangiisinut, pinngortitamut inuillu peqqissusiannut sunniutissai

Siunnersuut avatangiisinut pinngortitamulluunniit sunniuteqanngilaq. Aamma siunnersuut inuit peqqissusiat eqqarsaatigalugu sunniuteqanngilaq.

6. Innuttaasunut sunniutissai

Siunnersuut innuttaasunut aningaasatigut allaffissornikkulluunniit sunniuteqanngilaq.

7. Sunniutissai pingaarutillit allat

Siunnersuut allanik sunniuteqassanganneqanngilaq.

8. Oqartussaasunik kattuffinnillu il.il. tusarniaaneq

Siunnersuut tusarniaassutigineqanngilaq. Siunnersuutip taamaallaat Naalakkersuisut Inatsisartut sinerlugit piginnaatitaanerannik killiliinermut tunngasuunera, Inatsisartullu inatsisaata ukiuni arlalinni atorpeqarsimannginnera tassunga pissutaapput.

Aammattaaq pineqartumut tunngasup periarfissanngorniariarpat tamanut erseqqissaassutigineqar-nissaata naleqquttuunera pissutaaqataavoq.

Aalajangersakkanut ataasiakkaanut oqaaseqaatit

§ 1-imut

Nunanit allanit aningaasanik taarsigassarsinissaq pillugu Inatsisartut inatsisaata nr. 13, 28. oktober 1993-imeersup atorunnaarsinneqarnissaa siunnersuutaavoq.

§ 2-mut

Inatsisartut inatsisaata ullup saqqummiunneqarfimmi aqaguani atortuulernissaa siunnersuutaavoq.